



Publicaziuns dalla vischnaunca, jamna 3

Cussegl da vischnaunca

Ils cussegls da vischnaunca da Tujetsch e Mustér seradunan **venderdis, ils 24 da schaner 2014, allas 20.15** en sala da gimnastica a Sedrun.

Tractandas:

1. Beinvegna ed avertura
2. Lescha davart la taxa da cura e la taxa per promover il turissem: Revisiun parziala (messadi)
3. Informaziuns

Il president dil cussegl da vischnaunca

Referendum facultativ spirau

Ils 13 da december 2014 ha il cussegl da vischnaunca approbau la revisiun parziala dalla lescha d'explotaziun. Encunter quella decisiun ei enteifer il termin fixau buca vegniu fatg diever dil referendum, aschia ch'ella han contonschiu vigur legala.

La lescha d'explotaziun ei sco usitau publicada sin la pagina d'internet www.disentis.ch – Servis – Spurtegl virtual – Leschas.

Suprastonza communal

Rectificaziun d'ina publicaziun

El Fegl ufficial dalla Surselva dils 10-1-2014 ei vegniu publicau l'invitaziun alla seduta constitutiva dil cussegl da vischnaunca dils 10 da schaner 2014 en halla Cons. Tier quella publicaziun setracta ei d'in **sbagl administrativ**, cun quei che la seduta constitutiva per la perioda d'uffeci 2013/2016 ha giu liugia avon in onn.

Nus supplichein da perstgisar quei lapsus ch'ei capitaus senza malart.

Suprastonza communal

Controlla da habitonts

Mortori

Genoveva Catarina Andriuet-Simonet, naschida ils 2-12-1923, morta ils 9-1-2014.

Pendicularas Mustér

Nus offerin allas senioras (64 onns) ed als seniors (65 onns) dil cantun Grischun empau variaziun d'uront il meins da schaner. Vus saveis aschia profitar da suandonta porschida: **Naven da gliendis-dis, ils 13 da schaner, tochen venderdis, ils 24 da schaner 2014**, mintga di viadis gratuits cun la pendiculara a Caischavedra.



Apparats d'udida

Gliendisdis, ils 27 da schaner 2014 saveis Vus schar schubergiar e regular Vies apparat d'udida el Center da sanadad Sursassiala SA a Mustér che sesanfla en claustra ed a Curaglia. A Mustér ei il liug signalisau:

- Mustér naven dallas 14.00–ca. las 15.15
- Curaglia naven dallas 15.30–ca. las 16.30

L'union Pro Audito Chur, cun signur Arthur Jacomet fa quei survetsch per tuts interessents gratuita-mein.

Cordiala invitaziun

Center da sanadad Sursassiala SA

Secziun da catschadurs Péz Alpetta

Radunonza generala

Sonda, ils 25 da schaner 2014 allas 20.15 el hotel «Sax».

Referat e discussiun cul tema: Milch ist nicht gleich Milch

Mardis, ils 21 da schaner 2014 allas 20.15

Ils biars da nus consumeschan oz buca pli latg criu. Tenor la lescha svizra eis el buca bueivels e vegn perquei buca recumandaus.

Judith Mudrak s'engascha dapli onns per in nutriment natural e sanadeivel ed en special per il latg criu. En siu referat declara ella tgei che latg criu ei propi e tgei influenza positiva ch'el ha silla sanadad. Judith Mudrak ei oriunda dalla Svizra, mo viva dapi 1975 els Stadis Unis da l'America. Informaziuns tiel tema e tier la persuna: www.milchistnichtgleichmilch.com.

Il referat ha liug el Center sursilvan d'agricultura a Salaplauna a Mustér. Entrada libra, collecta per il referat. Silsuenter caffè e petta e naturalmein latg criu.

Cordial beinvegni!

www.agricultura.ch

Mummas cun affons pigns

Nus mein a magliar Raclette **Gievgia, ils 23 da schaner 2014**, Hotel Restaurant «La Furca» allas 19.30. Annunzias pren Ada Lutz sut tel. 081 947 61 31 bugen encunter entochen ils 20 da schaner 2014. Mummas e babs ein cordialmein envidai.

Mummas cun affons pigns Mustér



Contribuziuns per la Sibla

«Siblus» encuera aunc ina ni l'otra contribuziun (glossa) per la gasetta da tscheiver «Sibla 29» che cumpara il fevrer 2014. Contribuziun a scret cun il num e l'adressa digl'autur san ins tarmetter tochen ils **20 da da schaner 2014**: per e-mail siblus@tscheiver.ch, per posta Uniun da tscheiver Mustér, Gion Hosang, Via Plauncas 1, 7180 Disentis/Mustér, per fax 081 544 59 38, ni via la pagina d'internet www.tscheiver.ch.

Til da tscheiver da Mustér/Fasnachtsumzug in Disentis

Igl 1. da mars 2014 allas 14.00 ei il 35avel til da tscheiver a Mustér. L'Uniun da tscheiver Mustér envia pign e grond, da lunsch e da manaivel da separticipar al til. Nus selegrein sin Vossas annunzias.

Am 1. März 2014 um 14.00 Uhr findet der 35. Fasnachtsumzug in Disentis statt. Der Fasnachtsverein von Disentis lädt Interessierte ein, am Umzug teilzunehmen. Gerne erwarten wir Ihre Anmeldung.

Annunzias a/Anmeldungen an: Gion Hosang, Tel. 079 690 97 42, e-mail: gion.hosang@tscheiver.ch, Fax 081 544 59 38, internet: www.tscheiver.ch

Encuretg derschadra/derschader

La Dertgira nauscha da Mustér drova rinforzament! Eis ti ina presuna che has bugen satira e vul scriver e presentar quella sco derschadra/derschader dalla Dertgira nauscha? Lu eis ti nossa dunna respectiv nies um!

Neu dumengia ils **12 da schaner 2014, las 17.30** ella stanza d'exposiziun dil fravi Bundi per in pign casting. La Dertgira nauscha selegra da tia viseta.